

ortus, suo nomine usque in Oceanum delabitur. Sunt qui illum a Ptolemæo *Viadrum* vocari autumant. *Oderam* vocant ab Aucupibus vocabulo mutuato, qui speculas avibus speculandis captandisque constitutas, *Oderi* appellant: hodieque huiusmodi speculæ in moravia ad fontem Oderæ ab Aucupibus constituuntur. Neque *Hama* silentio prætereundus, quamvis tenuibus interdum aquis fluens, attramen eos agros rigans, quibus non alii in moravia Frumenti fertiliores, ita ut frumentarij coloni a largo frumenti velut ubere, jure suo illos lumen moraviæ appellent; in illis præterea sæpius quam in alijs Numismata M. Antonini, Commodique & aliorum nonnullorum Cæsarum, tam aurea quam argentea exseruntur. Quæ sane fidem bellorum cum marcomannis olim in moravia gestorum manifestam faciunt. Sunt & *Nigra* vulgo *Suarta* & *Sutrova*, qui Brunnam Civitatem, dignitate proximam Olomuzio præterlabuntur. Pisces varios & quidem magna copia hi fluvij subministrant. Regio hæc quam Bohemia minus montosa, nec tamen prorsus plana. Ponit hoc loco Ptolemæus *Orcynium Nervus*, ac *Gabretam Silvam*. Incolarum (qui feroces rapinarumque avidi) sermo mixtus est. Bohemicus tamen prævalet, nam Germanica Lingua in urbibus tantum inter Optimates in usu est; De cætero, ritibus moribusque perinde morati ut Bohemi, inquit Dubravius. In huius regionis pagis varie habitant Anabaptistæ omnium bonorum communionem professi. In Moravia ponit Mercator Comitatus *Huckenvaldt*, *Schonberg*. Dominia, *Lomnicz*, *Dubrantz*, *Gemnicz*, *VValstain*, *Peitnix*, *Neuhauß*, *Telesch*, *Bozkovvitz*, *Trebitsch*, *Dirnovvitz*, *Ragetz*.